

Paurongo Korinti Kpebung Yeneac Warackibi Ohoec

¹ Anutungo Pauro negennenu Yesu Kristoac aposoro anai nga negen negensinggoc tosonina Sostene, nereng kibi yomoc faide hade.

² Anutungo Korinti taonnu yeac kpebung kecdae, ngeni kpacngunuma Yesuac amma kpetiac mengunuec, ngeneac kibi yomoc faingemmedipe. Amma ngicngac sasawango Kebunina Yesu Kristoac kpac kpacandae, kibi yomoc ngenearu momoc faidipe. Kebu Yesu ye ngeni nga neni, nenanggac Kebu momoc. ³ Anutu Mannina nga Kebunina Yesu Kristo yereac danggunuc nga ruaengo ngenearu febeso.

⁴ Anutungo Yesu Kristoac amma wosoefac angemmeec, imocac ni nasosoc ngeneac negemma Anutu dangge edekekduae. ⁵ Ngeni yegoc kpeketahema kecgec yeng wiac sasawa hafoangoc ngemmeec. Yoacdede nga negen negentegec keme kemea imoc sasawa bic fengemmede. ⁶ Kristoac dedekperagi edenguning, imocac fora kekecnginau fingeru hemma kecgecde. ⁷ Imocac amma ngeni Yesu Kristo didiu fingetegerudeac tomai kecma Asuac wosoefacac kuc sasawa, imocac mong mi obohodaec. ⁸ Ye yengenaoc meseringunuu kechereemagec naso wisickeu ngeni Kebunina

Yesu Kristoac nasotoau kopocsicngina kpac nanggec yoacfu naric mi faingunuude. ⁹ Anutungo Medaha Kebunina Yesu Kristogoc momoc torokpegecdeac kpacngunuec amma yeng yoacdedea modarude.

¹⁰ Tosofocna, ni Kebunina Yesu Kristoac kpacfu negen negengngina midima yofi edengunuduae, ngeni sasawango yoacdedenginai nga negen negengnginai uba mocgu amma gurunendzic mi angemebisia. ¹¹ Tosofocna, Koroeac amaunac yeneng ngeneac yofi edenugec, “Yeni botucnginai tohoemema deendema angemema kecdae.” ¹² Ngenearunac ngic goango deandae, “Ni Pauroac ngic.” imoc deandae. Nga goango deandae, “Ni Aporoac ngic.” amma goango deandae, “Ni Kefaac ngic.” nga goango deandae, “Ni Kristoac ngic.” ngeni tembuc tembuc ifia dekecdae. ¹³ Negenggec, Kristo ye mi tohoc, kpac. Yeni ngeneac amma Pauro mariponnu mi kpegec. Nga Pauroac kpacfu doku mong mi nadzicngemmegec, imoc kpahac. ¹⁴ Ni ngenearunac mong doku mi nadzicngemmeai, imocac Anutu dengereduae. Krisipo nga Gaio yerisac nadzicyemerai. ¹⁵ Ifiac amma ngic mongngo yofi mi debeso, “Ni Pauroac kpacfu doku nadzirai.” ¹⁶ Stefana nga arengfora yeni ine doku nadzicyemmeai, fora. Amma torokpema goa nadzicyemmeai me kpac, imoc mong mi negenduae. ¹⁷ Kristongo doku nadzicyemmebadeac mi suenuec, kpac. Yeng ngicngac siduc gombang edekpou angemmebadeac suenuu hayai. Nga Kristoac mariponggac yoac imoc kucmama amba-

cac yoac imoc ngicac kucfu nga negen negentegec-goc mi debade.

¹⁸ Ngicngac hofeac sinnu kemedae, yeneng mariponggac yoac imoc negenggec ubasufu yoac angkecde. Amma Anutungo kopocsicac ebicfunac mesinunuu komoc kpenide, imocac ine nenang yofi negensikecdimbe, mariponggac yoac imoc Anutuac kuc. ¹⁹ Yoac yofi oho ohoya fedengoc, “Ni ngic negen negentegecnginagoc yeneac negen negentegec kpetotiebade nga ngic negen negenggoc yeneac negen negeng memabade.” *(Yesaia 29:14)*

²⁰ Anutungo bangec yomocac negen negeng mema kapa yeneac negen negentegecac tatacfu faiu ngicngac negen negentegecnginagoc, yeni mamea anggec. Nga mitiac negen negengngic yeni engena kpac. Nga ngic yoac mereng kpereng mema deandae, yeneng fora mong mi meficgegecde. ²¹ Nga ngicngac yeni bangecac negen negentegec-goc kecma Anutu negemmigecdeac obohogece. Obohoma siduc gombung denggbaringgema imocac ubasufuyoac deandae. Ubasufuyoac imocac yofi dekperagini Anutungo ngicngac ebicfunac mesiyunuu komoc kpegecde, ye faka imoc negenu ngereeude.

²² Yudangic yeni kuc hania hania isinggegecdeac faka kuhagocac kpesi kpesi faiandae. Nga griknngic yeneng negen negentegec keme kemea meficgegecdeac ayemmeude.

²³ Anu nenang ine Kristo mariponnu kpegec homeec, yoac imoc edekpou ayemmeni, yudangic yeneng imoc negenggec ubangina mi heiude nga griknngic yeneng negenggec imoc ubasufuyoac

angkecde. ²⁴ Anu Anutungo yudangic nga griknngic kpacyunuu negensinggegecde, yeneng Kristo arunac Anutuac kuc nga negen negentegec megecde. ²⁵ Anutuac ubasufuyoacngo ngicngac yeneac negen negentegec ferahema negen negengtoa anude nga kucmamayangon ngicngac yeneac kucngina ferahema kuctoayagoc anude.

²⁶ Tosofocna, ngeni siric dafia kecmagec, Anutungo kpacngunuu hanahema negensinggec, ngeni imocac siriha negensibisia. Ngenearunac ngic sebiubigeng negen negentegecnginagoc homac kpac nga ngicngac efeangosac kucngina engena amma kpacngina kekena, imoc homac kpac. ²⁷ Anutungo ngicngac negen negentegecnginagoc game kpekpeu faiyunuudeac ngicngac yeneac kicfu wiac ubasufuyagoc angkecde, ngicngac imoc meisingyunuec. Amma yeng ngicngac kucngina engena game kpekpeu faiyunuudeac ngicngac yeneac kicfu wiac kucmama angkecde, ngicngac imoc meisingyunuma meyunuec. ²⁸ Nga ngicngac yeneac kicfu wiac mamea angande nga wiac seuha deandimbe amma wiac kpac amma mi fede deandimbe, Anutungo imocnoc meisinggeec. Meisinggeu wiac goa engena angande imoc kpac anudeac ye ifi negenec.

²⁹ Anu bangecngic me ngac mongngo Anutuac kicfu namma yengenaac negenu engena ambacac, yeng ifi anec. ³⁰ Anutungo negengngem-meeccac ngeni Yesu Kristogoc kpeketahema kecdae. Yeng Yesu sueu Anutuac negen negentegec botucninau mehaec. Mehau nenang Anutuac

kicfu dindingac nga kpetiac annideac yeng kopoc-sicac witicfunac mesinunuec. ³¹ Imocac yoac yofi oho ohoya fede,

“Ngcic mongngo miacemebeso negende, ye Kebungo kekehau dafi ammiac, imocsac negemma miacemebeso.” (*Yeremaia 9:24*)

2

¹ Tosofocna, ni ngenearu hama Anutuac negen negeng sufu sufuya fede dekperagingem-mema yoacna efea me negen negentegectoac siricfu yoac mong mi edekpou angemmeai, kpac.

² Ni ngenigoc kecma yofi deba seriec, “Korinti taonnu kecma Yesu Kristosac dekperagibade nga ye dafiu mariponnu kpegec homeec, imocsac dekperagibade.” ³ Ni ngenearu hayai, imohai kucmama nga kengec amma dzonong fede fede anai.

⁴ Amma Anutuac yoac dekperagima yoacna songeagoc me negen negentegecfu mi wangepngunuai, kpac. Tiri Asuac kucfakango yoacna meseriu ngeni imoc hemma negenggec.

⁵ Ngeneac negen negensing imoc ngicac negen negentegecfu feu mi ngereeude. Anutuac kucngosac negen negensinggina nanggeu febeso.

⁶ Imocac amma goa ngeni bic yadiseri anggec, ngeni yoac negen negentegecgoc edengunuandimbe. Yoac dedimbe imoc naso yomocac negen negentegec kpac nga naso yomocac engena yeneac negen negentegec mi ande, nocac ngadeau kpac andacgecde.

⁷ Nga Anutuac kuc nga kibikperagingo fingctegecnemmeudeac ye bangec nga kurumeng mi fingecmaec negen negentegeha

sufu sufuya imoc faiec feec, negen negentegec imocnoc dekperagidimbe. ⁸ Naso yomocac engena sasawa sawau me bangecfu yenearunac mongngo negen negentegeha mi negenggec, kpac. Yeni imoc negembau dede yeni kuc nga kibikperagi mingina Kebu mariponnu naric mi kpebau. ⁹ Imocac yofi oho ohoya fede,

“Anutungo wiac kicngo mi hehena nga kedzac-ngo mi negen negena amma ngic hereau mi negen negenga, imoc arenggema ngicngac ye hoanggema heregoc yea songo negenggecde, wiac imoc yeni yemmeude.”
(*Yesaia 64:4*)

¹⁰ Anutungo wiac imocacnoc negensima Asuya sueu dekperaginemmeu negening. Yeng wiac sasawa hennegeng amma Anutuac negen negeng keme kemea momoc hennegeng angkecde.

¹¹ Geng ngic monggac ubaherea nga negen negena naric mi negennade, kpac. Ngicac ongaasungosac imoc negenude. Siriha ifiangoc mongngo Anutuac ubaherea nga negen negena naric mi negenude, imoc kpac. Anutu yengena Asungosac wiac imoc negengkecde. ¹² Anutungo wiac hania hania wosoefacfu nemmeec. Amma nenang imoc negentegecniideac Asuya nemmeu meing. Bangecac asu mong mi meing, kpac. ¹³ Nga Anutungo wiac nemmeec, imocnoc dekperagidimbe. Yoac imoc ngicac negen negentegecfu mi dekecdimbe, imoc Asuac negen negentegecfunoc modacma denide. Neni Asuac yoac imoc Asuac kucfu dekperaginide.

¹⁴ Anutuac Asuarunac Asuac wiac, imoc ngic mong ye Anutuac Asuya kpac kecma naric mi

meude. Imoc yearu ubasufu faka anude. Asuac wiac imoc asuu henegeng ambesonga, imocac amma ngic Asuya kpac, yeneng Asuac wiac mi negenggede. ¹⁵ Ngic Kebuac Asugoc kecde, yeng wiac sasawa naric hengising anude nga ngic mongngo ngic imoc naric mi hengising ammiude.

¹⁶ Mitikibininau yoac yofi oho ohoya fede,
 “KEBUAC negen negeng imoc ngic mongngo naric
 mi negenude nga mongngo ye dederecge
 naric mi ammiude.” *(Yesaia 40:13)*
 Nga nenang Kristoac negen negenggoc kecdimbe.

3

¹ Tosofocna, warac ngenearu hayai, imohai ngic Tiri Asugoc kecdae, imocac sirihau yoac edengunubadeac osiai. Ngeni Kristogoc kpeketahema sabac siricfu kecgecac ngicngac uba esea modacgec edeyunuanduae, ifi isoc yoac edengunuai. ² Ngeni naso imohai yaka seria negecdeacsoc mi anggecac namusac gumecngunuai. Nga ngeni yagucngoc yaka seria negecdeacsoc mi ande. ³ Ngeni uba eseaac siricfu kecdaengoc. Imoc yofiac, ngeni keracmangang angemema yoacngina ngabasiric deendema angemeandae. Ngeni ifi amma ngictehec siric kecma ⁴ mongngo deude, “Ni Pauroac ngic.” Nga mongngo ine deude, “Ni Aporoac ngic.” Ngeni ifi degecdeu negemba ngeni ngictehecac arennu kecdae.

⁵ Aporo ye merac nga Pauro ye merac? Neri kingangkpekpesac andipe. Kebungo ua nemeru neri imocac sirihau ua mekecdipe. Mekecde ngeni yoacnira hoanggema ye negensinggegec.

⁶ Neng komoc homecba Aporo yeng imocac witiau doku kpakeec. Nga Anutungo uaya mema imoc meyadiude. ⁷ Ngic yaka homerude, ye engena kpac nga doku semeng witiau kpakeande, ye engena mi ande. Anutungo wiac meyadikecde, ngeni yeac negenggec engena ambeso. ⁸ Amma ngic wiac homecande nga ngic doku witiau kpakeande, yeri uangiraac hania mocgu ande. Ngade kecma yeri tembuc tembuc uangiraacsoc bung meecde.

⁹ Neri Anutugoc ua mekecdipe nga ngeni Anutuc semengua nga yeac ama. ¹⁰ Anutungo wosofac anemma amamemeac negen negeng nenu imocac ngiha anai. Ifiac amma ni imocac sirihau simengwotung arenggema ukuba kemeec. Nga imocac witiau ngic goango torokpema ama megecde. Amma amamemengic yeneng uangina dafi mekecma simeng witiau ama torokpema mekecdae, imoc tembuc tembucngina isinggema mebisia. ¹¹ Anutungo Yesu Kristo bic gununggeec simengwotunga isoc nande. Nga ngic mongngo yeac tegiau wotung mong ukuu kemeudeac singa mi fede.

¹² Anu ngic mongngo simeng imocac witiau torokpema ua mekefude, yeng gol me siriwa me hoc seria siriha gombunga me ic me birohoc me tomocngo meudeu ¹³ uayaac hania Kebuac nasotoau fingectegerude. Naso imohai gerecngo uani-naac hania tembuc tembuc tobanggema mekperaginemmeude. ¹⁴ Ngic mongngo ama meu gerecngo uaya tobanggeu seria nanudeu ye imocac ua bung meude. ¹⁵ Nga monggac uaya dzeude isoc

wiaha tegecma kpac anude nga Anutungo yengena gerecfunac mesiu komoc kpeude.

¹⁶ Ngeni yofi negembisia, ngeni Anutuac womong nga Anutuac Asungo ngeneac here manau kecede. ¹⁷ Nga ngic mongngo Anutuac womong memanganeudeu Anutungo ye ifingoc memanga-neude. Anutuac womong imoc kpetiac nga womong imoc ngeninoc.

¹⁸ Ngic mong yengenaocngoc ikoc mi angemebeso. Botucnginaunac mongngo yengena negensima yagucac negen negentegec mekecdeu yeng bangecac ngic yeneac kicfu ubasufuyagoc amma negen negentegec fora meficgebeso.

¹⁹ Bangec yomocac negen negentegec imoc Anutuac kicfu ubasufuyagoc. Imocac yoc yofi oho ohoya fede,

“Ye ngic negen negentegecnginagoc yeneac yoc dzegema yenang botacfu faiyunuude.”
(*Hiobe 5:13*)

²⁰ Amma mong yofi,

“*KEBUNGO* ngicngac negen negengnginagoc negendacde. Ye ngicngac denegengngina hennegeng amma negenu imoc uaya kpac ande.”
(*Mitiyegec 94:11*)

²¹ Ngeni ngic monggac kpara kpacma yegoc torokpema sebiengeng angandae, imoc mi ngereede. Imoc yofiac, wiac sasawa imoc ngeneac bic anec. ²² Imoc Pauro me Aporo me Kefa me bangeha bangeha me kecec me homec me wiac mong bic faifaia fede me dengec fingerude, imoc sasawango ngeneac. ²³ Nga ngeni ngenaocngoc Kristoac ngicngac nga Kristo ye Anutuac ngic.

4

¹ Nenang Kristoac kingangkpekpefora. Nga yeng Anutuac negen negeng sufu sufuya, imoc garenggenideac uayoac nemmeu ua imoc mekecdimbe, ngicngac yeneng ifi negembisia.

² Ngic mong ye gareng ua mekecde, ye enaraac yoac modacma sing naric mi segebeso.

³ Nga ni neannaac yofi deba, ngeneng me ngic goa yeneng yoacfu fainuma yoacna desigecde, imocac negemba wiac engena mi ande. Nga neannaoc ifingoc naric mi isingemema forana debade.

⁴ Here negen negennau hofocemema ebic mong mi meficgeduae, fora. Nga ni kopocsicna kpac, imoc naric mi debade. Kebungo haniaa hen-negeng amma yoacna desiude. ⁵ Imocac amma ngeni nasoya mi fingecmanungoc ngic monggac yoac mi desibisia. Kebu yengenaoc hama wiac kundunnu sufuma fede, imoc mekperagima ngicngac negen negengnginaac hania didiu faiu fingectegerude. Amma yeng naso imohai ngicngac tembuc tembuc dedengrecngina edeyunuu negenggecde.

⁶ Tosofocna, ngeni yoacna negentegecgecdeac yomohai ngeneac amma neanna nga Aporoac sing edengunuba negembisia. Yoac mitikibiu oho ohoya fede, ngeni imoc mi ferahebisia. Ngeni ngic monggac sebi meemma monggac sebi mi memabisia. Ngeni negen negeng imoc megecdeac negenduae. ⁷ Geac fakaga imoc siruha mong kpac, ge wiac sasawa mekecnec, imoc eng genggena mekecnec. Anu wiac imoc engsac genggec, imocac amma sebiga mi meembesena.

⁸ Ngeni bic gebecngunuu finactoanginagoc anggec amma ngeni nenia kpac ngictau andae. Nga forangoc, ngeni ngictau fora kecbau debac songona kuneng ambac. Nga ngeni ngictau ambau isoc neneng ngenigoc kecma ngictau momoc ambing.

⁹ Ni yofi negenduae, Anutungo aposoro fainunuu ngicngac yeneac areng wisic wisickeau nandimbe. Yeni tenicfagoc anemmegecdeac wenac kpekpeu fainunugec. Ngicngac nga angero yeneac kicfu gameagoc nga homeac areng isoc kecandimbe. ¹⁰ Neni Kristoac amma memaemema ubasufu isoc anni ngeneng ine sebingina meemma, “Neni Kristogoc kpeketahema fitira kecdimbe.” ifi deandae. Nga kucmama kecmi ngeneng kucnginagoc kecgcede. Nga ngicngac yeneng ngeni ewehihei faka angememema neni ine mangana dema wanunuandae. ¹¹ Anu neneng naso yofinenggac ifingoc hereninaac homema dokuac anemmeu wamba tegec tegera heima kecni ngicngac yeneng nunuandae. Amma amagerecnina kpac kuric isoc kecma ¹² nenaoc marininango uatoa meandimbe. Ngic yeneng sowecnunugec ine kenecyununide amma nunukporac anemmegec ubanina mi mau serima kecnide. ¹³ Nga ngicngac yeneng dengbarinnunugec yeneac yoac gombunga denide. Neni yofinenggacngoc bangecfu seuc isoc anni ngicngac yeneng ukununugecde.

¹⁴ Gameac yoac edengunubadeac yoac yomoc mi ohongemmeduae, imoc kpac. Ni ine songonambaracfocna demeting angemmedade,

ifi isoc ohongemmeduae. ¹⁵ Ngeni Kristogoc kpeketahema kecmagec garengfocngina teng tauseng demeting angemmebau ngeni sifu mangngina mocgusac kecede. Nennoc siduc gombang angemmeba ngeni Kristoaru kpeketahema kecec gboria meficgecec. ¹⁶ Ifi anu negen negengngina midima edengunuduae, ngeni ni dafi amba hemma modacnuma anduae isoc ambisia. ¹⁷ Imocac amma yaguc Timoteo sueba ngenearu haude. Ye songomedacna kecma Kristogoc kpeketahema kecede amma ye yocac modacma mong mi segeude. Ni Yesu Kristogoc kpeketahema dafi kecanduae, yocac imoc kpebung sasawa fekendae, ngeni edekpou angemmeanduae. Nga Timoteongo ngenearu hama yocac imocnoc heigboringemmeude.

¹⁸ Ngic goa ngenearunac yeneng neac ifi negemma deandae, “Ye nenearu mi haude.” goa ngenearunacngo neac ifi negemma sebingina meemma yocacna kpeandae. ¹⁹ Nga Kebungo negenu ngereeude isoc naso mi hereemanu ni ngenearu habade. Hama yocac kpekpe areng kucngina dafi fede, imoc hennegeng ambade. Amma yocacnginasac mi negembade. ²⁰ Anutuac eucerereng imoc yocacfusing mi fingectegerude, imoc kpac. Imocngo Tiri Asuac kucfu fingectegerude. ²¹ Anu ngeni neac dafi angemmede, imoc edenubisia. Dzikacgoc habadeac angemmede me heresongogoc nga yumea kekecac asugoc habadeac angemmede?

5

¹ Ngenearu kaisero faka fede, yocac ifi degec

nengening. Kaisero faka mong bangec monnunac ngicngac Anutu mi negemmidae, yeneac botucfu mi feande, imocnoc ngeneac botucfu fede. Imoc ngic mongngo mamaac enemagoc feyac angandape. ² Faka ifi femanu ngeni ine sebingina meengandae, imoc naric mi ande. Ngeni imocac ubahodung negemma ngic faka imoc angande, ye botucnginaunac meickebau, imocngo ine ngereebac. ³ Ni sebingo hereau kecduae, fora. Nga ongaasunango ine ngenigoc kecduae. Ifi kecma ngic imocac fakaya isinggema bic desiai. ⁴ Ngeni nga ni, nenang ongaasuu Kebunina Yesuac kpacfu kpedzucnema kecmina Kebunina Yesuac kucngo nenanggoc feu ⁵ nenang ngic ifia Satanggac mariu faibisina. Nga sebiango bangecac faka sasawa modackecde, imoc memanganedaru kpac anu ongaasuyango Kebuac nasotoau komoc kpebeso.

⁶ Sebiengengfakangina imoc naric mi ande. Ngeni yis kapianeacsac uuhau faigec imocngo uuha sasawa meu sokoande, ngeni imoc bic negendae. ⁷ Anu nenang ramamedaha Kristo, yeni sese imoc bic kpegec homema dzuacnunuac. Imocac ngeni uuha esea yisgoc meickedacma uuha gboria faibisia. ⁸ Imocac amma nenang uuha esea yisgoc, imocac ngaba nga faka mangana wadacma faka kongaha nga yoac foragoc, imocac ic sogong yisha kpac mekecbisina.

⁹ Ngic serofaka angandae, ngeni yenigoc kpeketahema mi kecbisia, imocac kibiui bic ohongemeai. ¹⁰ Amma bangecfu areng serofakangi-nagoc me kichodungnginagoc amma ngic ikoc amma ngicngac wiacngina wangecyunuandae

me nemu ewehiyemmeandae, ngeni yeni sawa wayunudacgede, imocac ine mi negemma dedua. Ngeni imoc anggedeu ngeni bangec yomoc wadacma kenggedeac singsac fengemmeude. ¹¹ Ngeni negen negensinggoc tosofocngina deyemmeandae, yeneac negemma ine yofi ohoai. Yeni serofaka angandae me hiedzoac kichodunggoc kecandae me nemu ewehiyemmeandae me ngicngac goa deendema ayemmean-dae me doku seria nekecma ubasufu angandae me ngicngac ikoc ayemmema wiacngina wange-cyunuandae, faka ifia angandaeu ngeni ngicngac imoc yenigoc kpeketahema mi kecbisia nga ngeni yenigoc yaka ifingoc mi nebisia.

¹² Ngicngac ngadeau kecdae, yeni isingyunuma yoacngina naric mi desibade, imoc neac ua kpac. Ngeni ine arengfocngina botucnginau kecdae, yeni isingyunuma yoacngina desibisia. ¹³ Nga Anutungo ngicngac ngadeau kecdae, yeneac faka nga angammemengina isinggema yoacngina desiuide. Ngeni ngicngac mangac manganea botucnginaunac meicyunubisia. (*Dedeseri 17:7; 19:19; 21:21; 22:21,24; 24:7*)

6

¹ Fakangina yomoc mi ngereeude. Ngenearunac ngic mongngo ogea ngaba ammima gamea kpacngo kpetiac tosofora yenearu mi kemma feracyunuude. Feracyunuma ngic negen negensingngina kpac, yenearu kemma ogea yoacfu faiande. ² Kpetiac areng ngeneng kecma ngiha ngiha yoacngina desibesandae. Ngeni imoc mi negendae gedang. Ngeni ngade

ngenaoc ngiha ngiha yoacngina desigecde, imocac ngenaoc yofinenggac wiac efeanec yoacfu ifingoc desibisia, imoc ngereeude. ³ Amma ngeneng ngade angero isingyunuma yoacngina desigecde, ngeni imoc negendaenoc. Ifiac amma ngeni faka goa botucnginau fede, imoc naric isinggebisia. ⁴ Yaguc ine yoac mong botucnginau fingeru ngeni sing segema ngic goa kpebunggac eweheiheiu mi kecdae, yeni meisingyunuma yoacngina desigecdeac faiyunuandae. ⁵ Ngeni gamengunuudeac negemma imoc deduae. Nga geneac botucfunac ngic mongngo negentegecma kecma tosofora yeneac ebicyoac dema mengereude, imocngo naric ambac. ⁶ Nga yofinenggac ngeni ine negen negensinggoc tosofocngina kecdae, ngeneng negen negensingngina kpac, yeneac kicfu kemma yoacfu faiemeandae.

⁷ Ngeni yoacfu faiemeandae, faka imocngo edzacngunuude ngeni firang mi andae. Nga tosofocngina yeneng ikocfu yoacngina dema me wiacngina wangepcngunuandae, ngeni imoc eng wagec feu ngereebac. ⁸ Nga ngeni ine negen negensinggoc tosofocngina mangana nga ikoc ayemmema wiacngina wangepcyunuandae.

⁹ Ge ikoc mi angemebesena amma yoac yomocac mi obohobesena. Ngicngac Anutuac yoac kpeandae, yeneng Anutuac eucererengaac maridzoming naric mi megecde. Kaisero faka angandae me nemu eweheyemmeandae me singtoa ngac yenearu kengandae me ngic goa yeneng ngic ogo-focnginagoc fema ngacgoc kekec isoc kecandae

me ngic goa yeneng meficyunugecdeac negemma kpaee mi heiyemmema engsac ngic ogofocnginagoc feandae me ¹⁰ hamangecmeme me ngicngac kichodungnginagoc me doku seria nema ubasufu angandae me enacfu faifai yoac deandae me ikoc amma hiedzo wangecyunuandae, areng ifia yeni sasawango Anutuac eucererenggac maridzoming naric mi megecde. ¹¹ Nga ngenearunac ngicngac goango warac ifi kecgec. Ifi kecmagec Kebungo yengena kpacfu nga Anutuninaac Asu yeac kucfu dzuacngunuma dindingac dengemmema kpetiac arennu faingunuec.

¹² Goa yeni deandae, “Ni faka hania hania sasawa naric ambade, kpaee mong mi fede.” Nga neng ine deba, “Wiac sasawa imocngo memefihagoc mi ande. Wiac sasawa naric ambade, fora. Nga wiac mongngo ine garennubeso anu imoc wama naric mi modachbare.” ¹³ Yaka imoc hereninaac amma fede nga hereninango yakaac amma fede. Nga kecma Anutungo meicyuruu kpac anecde. Sebininango Kebuac amma fede, imoc serofaka anudeac amma mi fede nga Kebu ye sebininaac amma kecde. ¹⁴ Anu Anutu kuctoayango Kebunina megboriu yarec, kecma yeng nenang ifingoc megborinunuu yacnide.

¹⁵ Anu sebingina imoc Kristoac sebiaac tosea ande, ngeni imoc negembisia. Nga ni Kristoac sebia tosea singtoangacgoc kpeturanggeba yeac sebiac noboha anu mi ngereeude, imoc kpac yombong. ¹⁶ Imoc yofiac, ngic mongngo serongacgoc feudeu ye yegoc sebi mocgu andape, ngeni imoc negembisia,

“Ngicngac yohockang yeri sebi mocgu anecde.”
yoac imoc dedea fede. (*Fingec fingec 2:24*)

¹⁷ Anu mong ye Kebugoc kpeketahema kecde, yeng yegoc asu mocgu anecde.

¹⁸ Ngeni kaiserofaka woramima meickebisial! Nga mong ye faka nga angammeme mangana goa angande, imoc yengena sebiac ngadeu angkefude. Nga sero angande, ye ine yengena sebia kopocsic meficgemima memanganeemeude. ¹⁹ Anutungo Tiri Asu ngemmu mekecdae, ye ubaherenginau kefu sebingina imoc yeac womong, imocac ngeni ngenaoc ubasebinginaac mingina kpac. ²⁰ Ngeni bungngina memea nga Kebungo bung imocac-soc faiec, imocac ngeni sebinginango Anutu kpac kuneng mibisia.

7

¹ Ngeni kibinginau yofi kpesinenggec, “Ngic ye ngacgoc feude, imoc naric me kpac.” imocac yofi deba negenggec: ² Kaisero faka fingebacac ngic tembuc tembuc ye yengena enemagoc ambeso nga ngac tembuc tembuc ye yengena eweagoc ambeso. ³ Nga singngo wiac dede, ngicngo enema imoc mibeso nga ngacngo ifingoc ewea imoc mibeso. ⁴ Amma ngac ye yengena sebiac mingina mi ande, kpac, eweango ine yeac sebiac mingina ande. Nga ifi isocngoc ewea ye yengena sebiac mingina mi ande, kpac. Enemango ine yeac sebiac mingina ande. ⁵ Imocac eweeneng ngeri ngeraocngoc sebingira mi segereemebesera. Ngeri naso goausac numuecdeac uba mocgu amma naso dema naric segereemebesera. Nga ngeraoc sebingira garengemeecdeac kuc mi fengecmedeac

Satangngo faitobannu faingurubacac ngeri naso wegenanecsac eng kecma monggoc ngerahafoc kecbesera. ⁶ Nga imocngo dedeseriyoac mong mi ande. Ngeri dafi naric anecde imocac deduae. ⁷ Neanna songo ine yofi, ngicngac ngeni ni kecduae isoc kecgec ngereebac. Anu Anutungo wosoefahaac wiac nemmeande, imoc ngicngac tembuc tembucnina nemmeu mekecdimbe. Ye ngic mong kuc yoc mima mong imoc miude.

⁸ Ngic goa ngeni ngac mi mema eng kecdae amma ngachodzec ngeneac yofi deba negenggec, ngeni ni isoc eng kecgecdeac negemba ngereede. ⁹ Ngeni garengemegecdeac kuc imocacsoc mi fengemmeu, ngeni seroac songngo herenginau ereu manganebauac memeturannu meemema eweeneng anggec ngereede.

¹⁰ Nga eweeneng ngeneac yoac yomoc demeseri angemmeba yoacna modacbisia. Ngac mongngo ewea naric mi wabeso. Imocngo neac yoac kpac, imoc Kebuac yoac. ¹¹ Ngac mong ye ewea wama kenudeu yofi ambeso, ye eng kecbeso me ewea warac kefec, yearu monggoc kemma yegoc ruae meficgema eweeneng monggoc ambesera. Nga ngic mongngo enema naric mi wama kembeso.

¹² Amma ngicngac tosea ngeneac yoac mekeduae, imoc ine Kebuac enacfunac mi meing. Ngic monggac enemango Yesu mi negensinggema eweagoc kefudeac negendeu, ngicngo enema mi wabeso. ¹³ Me ngac monggac eweango Yesu mi negensinggema enemagoc kefudeac negenudeu ngacngo ewea mi wabeso. ¹⁴ Ngac mong ye ewea negen negensinga kpac kecde, ye ewea kpetiac

anudeac ammiude. Nga ngic mong ye enema negen negensinga kpac kecde, ye enema kpetiac anudeac ammiude. Ifi mi anggedeu nambarac-focngina seucnginagoc kegede. Nga nambarac yeni ine yofinenggac kpetiac andae. ¹⁵ Anu mongngo Yesu mi negensinggede, yeng ewea me enema negensinggede, ye waudeac negensiu kpaie mi faibisia. Anutungo ruaegoc kecnideac kpacnunuec. ¹⁶ Ngac, geng ewega kopocsicfunac mesina komoc kpeude me kpac, imoc naric mi negennec. Nga ngic, ge enengga kopocsicfunac mesina komoc kpeude me kpac, ge imoc naric mi negennec.

¹⁷ Anutungo ngicngac kekecnginaac sirihau mocgu mocgu kpacngunuma heitaingunuu ngeni imocac sirihau kecbisia. Amma kpebung sasawa ngeneng faka imoc modagecdeac eden-gunuanduae. ¹⁸ Ngic mong ye sebi tosea herec herecgeac areng kecmanu Anutungo ye kpacma heitaiecfu yeng negen negeng imoc mesufuudeac ua mi mebeso. Nga ngic mong ye sebi tosea mi herec herecgea kecmanu Anutungo kparecfu yeng sebi tosea mi herecgebeso. ¹⁹ Sebi tosea herec herecgea me mi herec herecgea, imocngo wiac engena mi ande. Nga Anutuac nonoyoac modachesonga, imocngo wiac fora yombong. ²⁰ Nga ngic mocgu mocgu ngeni kekec sirihadafi kecmagec Anutungo kpacngunuma heitaingunuec, ngeni kekec sirihaimocngoc kecbisia.

²¹ Ge minginggaac wanacngic kecmana Anutungo kpacguecfu imocac negengyohoc mong mi ambesena. Nga ge ngic yungec yungec anadeac sing fingeccenu imoc naric modachesena.

²² Ngic mong ye minginaac wanacngic kecmanu Kebungo kpacma heitaiecfu, yeng naso imohai sifu Kebuac ngic witiha kpac ande. Amma ngic mong witiha kpac kecmanu kparu, yeng sing ifiangoc Kristoac wanacngic anu Kristongo yeac mingina anude. ²³ Kebungo bungngina bic meec, imocac ngeni ngic yeneac bageu wanac areng mi kecbisia. ²⁴ Tosofocna, ngeni nanang siriha dafi nammagec Kebungo mocgu mocgu kpacngunuma heitaingunuec, ngeni siric ifiangoc Anutuac kicfu kecbisia.

²⁵ Ngac goa ngeni ngicfu mi kemma eng kecdae, ngeneac negemma Kebuarunac singyoac mong mi fenende. Nga Kebungo wosoefac anenec, imocac sirihau negen negenna deba ngeni negengyohoha kpac kecma yoacna naric modacbisia. ²⁶ Naso yomoc ebic kuneng fingecma fedeac amma ngeni yofinenggac kecdae isoc, ifi torokpema kecgec ngereeuide, ifi negenduae. ²⁷ Ge enenggagoc bic dzegeemeocfu ngac wabesonga mi negensibesena. Nga yoac dedzegega kpac kecma ngac menadeac hofoha fai mi ambesena. ²⁸ Nga ge sifu ngac mong menadeu kopocsic mi meficgenade. Nga ngac mongngo eng kecma ngicfu kenudeu ye ifingoc kopocsic mi meficgeude. Eweeneng angkecdae, yeneac kekecfu ebic hania hania fingecande, ni imohacnac onggongngunubadeac negenduae.

²⁹ Tosofocna, naso wegenanecsac fede, ifi deduae. Ifiac amma ngic enenggoc kecdae, ngeni enengfocngina kpac, ifi isoc kecbisia. ³⁰ Nga ngicngac kiackecdae, ngeni kiacngina kpac, ifi isoc kecbisia. Nga ngicngac sogac sogaigoc kecdae,

ngeni sogac sogaingina kpac, ifi isoc kecbisia. Amma wiac bummedae, ngeni wiacngina kpac isoc kecbisia. ³¹ Nga ngicngac bangec yomocac wiac bummema mekecdae, ngeni wiacngina efeanec feyemme, ifi isoc kecbisia. Nga bangec yomoc yaguc fede, imoc kpac ambesande.

³² Bangecac ebicngo mi fingecngemmeudeac songona ande. Ngic ngacfu mi kenec, ye Kebuac wiacac negen negenga kuneng femide amma ye dafi anu Kebungo negemmiu ngereeudeac ua meude. ³³ Nga ngic mong ye ngac bic meec, ye ine bangecac wiacac negen negenga kuneng femide amma ye enema faka dafi ammiu enemango negemmiu ngereeude. ³⁴ Ifi amma negen negenga tohoma yohockang anude. Nga ngac naroang me ngac koscic ye Kebuac wiacac negen negenga kuneng femide, ye yofi negende, “Ni dafiu kecba sebina nga ongaasuna kpetiac anude.” Nga ngac mong ye ngic bic meec, ye ine bangecac wiacac negen negenga kuneng femide, ye ewea faka dafi ammiu eweango negemmiu ngereeudeac ua momoc meude.

³⁵ Ngeni meficngunubadeac amma yoac yomoc deduae, imoc kudoc kpengemmedadeac kpac. Ngeni sirihau kecma Kebuac ua nasosoc mekecmagec bangecac wiacngo negen negengngina mi mesufubeso, ifi negenduae.

³⁶ Ngac mongngo ngicfu kengkenggac nasoya ferahema sifu ngicfu kenudeac ammiu mamango hanahema kpetarima ngade negengyohoc amma naric deude, ye kopocsic mi meficgeude. Nga naroanga ngicfu naric kenude. ³⁷ Nga manggac

mong ye negengyohoc mi amma naric garengemema naroanga ameau tacheso, imoc ubayau bic negenseriye ye fakaya gombunga anude. ³⁸ Nga ngic mong ye naroanga ngicfu faiude, ye fakaya gombunga. Nga mongngo naroanga ngicfu mi faiude, yeng monggac fakaya feraheude.*

³⁹ Ngac mong ye ewea gbori kecede, ye ewea kecmamu yegoc kpeketaemema kecbesera. Kecma ewea homeu ye ebiha kpac amma ngic monggaru kembeso dema songea anu naric kembeso. Imoc Kebuac negen negennu ambeso. ⁴⁰ Nga ye eng kecbac debac keneha engena ambac. Neac negen negeng ifi ngemmeduae. Nga ni ifingoc Anutuac Asugoc kecduae, imoc negensiduae.

8

¹ Ngicngac yeni yang kpema nemuac sesengina faima neandae, imocac hania yofi deduae, nenang sasawango negen negentegecgoc kecdimbe, imoc negendimbe. Nga yofi ifingoc negendimbe, “Negen negengngo ngicngac sebingina meenude.” Nga heresongogoc kecec imongngo ngicngac nanggeyunuude. ² Ngic me ngac mongngo yofi negemma kecdeu, “Ni negen negentegecnagoc.” ye negen negentegec kecec dindin-gacac siricfu mi kecede. ³ Nga mong ye Anutu heresongogoc hoanggedeu Anutungo ye negemiude.

⁴ Nemuac sese nebesonga me kpac, imocac yofi bic negentegecdimbe. Anutu mocgungo kecede

* **7:38:** Kebanga 36-38 mitiac negen negengngic imocac hania uba mocgu mi andae. Buk Baibelu sing mong meremmerenga fede.

nga nemu yeni wiac fora kpac. ⁵ Ngicngac yeni nemungina sawau me bangecfu kecgec kpacngina anutu deyemmeandae. Kebu nga anutu ifia homac kecdae. ⁶ Ifi kecmagec Anutunina ye mocgusacnoc. Yearunac wiac sasawa finge.cdarec amma ye imocac mama nga nenang yeac amma kecdimbe. Kebunina Yesu Kristo ye mocgu nga yeac witiu wiac sasawa nga nenang kecdimbe.

⁷ Negen negentegec imoc ngicngac goa yeneac ubau mi fede, yeni nemuac negemma faka fora dema yeneac sese nema kpanggeyunuandae nga here negen negengngina kucmamango seuhagoc anude. ⁸ Nga yakanene imocngo Anutuac wegenacfu mi fainunuude, kpac. Yaka nenide isoc imoc yeac kicfu engena mi ande. Nga mi nenideu isoc wiac monggac mi obohonide. ⁹ Goa ngeni ine negengefaima nemagec tosofocngina kucmama kecdae, yeni yakaac amma faitobannu faiyunugec mayunubacac ngeni gareng meemema kecbisia. ¹⁰ Ge negen negentegecgagoc. Amma geng nemuac womonnu tacma nenadeu ogoga mongngo here negen negenga kucmamango ihai kecma fakaga hemma ubea midiu yeng nemuac sese ifingoc nema ubayohoc meficgeude. ¹¹ Ge ifi angkecma negen negentegecgagocngo ngicngac kucmama memanganeyununade. Nga Kristongo tosoga yeac ifingoc homeec. ¹² Amma ngeni tosofocngina yeneac here negen negeng memanganeyemmegec kucmama finge.cyemmeu Kristoaru kopocsic meficgegede. ¹³ Imocac amma yofi deduae, ni yakanango tosona ebicfu faiba makpebacac naric yang wama monggoc mi nebesare. Negen

negensinggoc tosona ebicfu faibadeu, imoc mi ngereeude.

9

¹ Ni ngic kpaea kpac amma ni aposoro. Kebunina Yesu kicngo hemma Kebutoc kpeketahema kecma ua mekecba ngeni ua imocac fora andae.

² Foracngoc, ngicngac goa yeneng neac yofi negendae, “Ye aposoro kpac.” ifi negenggec ni sifu ngeneac aposoro anduae. Amma Kebuac aposoro kecduae, ngeninoc imocac foraya andae.

³ Ngicngac goa yeneng neac ngadeyoac dema kecgoc imocac turunga meremma yofi edeyunudu-
uae, ⁴ kpebung yeneng neri ifingoc yaka nemecgec nedede, imoc singngo dede. ⁵ Amma neri ifingoc enenghocnira negen negensinggoc kecdape, sinnu meyurude habing, imoc ngereebac. Aposoro goa nga Kebuac munafora amma Kefa, yeneng enengfocnginagoc kengha angandae. ⁶ Nga Banabagoc nerengsac kekecniraac wiac fingerudeac ua marinirango medede, ngeni ifi negensiandae. Nga imoc kpac, singngo ifi mi dede. ⁷ Wasai ngic mongngo wasaiua mema yengenaarunac bunggak dzo mi meude. Nga mong ye waing homeru fora anu yengenaoc gbomea mema neudenoc. Me mongngo ramaburumaka garengyunuma kecande, yeng yeneaarunac namu menec angande.

⁸ Ni ngic yeneac negen negeng mema yoac yomoc mi deduae, kpac. Dedeseriyoacngo imocac ifingoc dede. ⁹ Mosengo dedeseriyoacfu yofi ohoec fede,

“Burumakango wit sebera meickebesonga tidzameudeac ua ebiria mekecde, imocac dumbenga mi dzegebesena.” *(Dedeseri 25:4)*

Anutungo burumaka yeneac negemma imoc mi deec, kpac. ¹⁰ Foracngoc, ye ngicngac nenanggac ifingoc negemma ifi deec. Imoc nenanggac momoc negemma oho ohoya fede. Ngic bangec mendzickecde nga ngic wit sebera kpetima kecde, yeri fora nasoya hau ua imocac foraac noboha meecdeac negensima ua mekecdape.

¹¹ Anu Anutuac Asuac gbome ngenearu kpeginideu ngenearunac ifingoc sebiac mefic menide, ngeni imoc negenggec ngereebes.

¹² Nga ngic goa yeni ngenearunac wiac goa naric megeddeu neneng imoc torokpema monggoc menide, ngeni ifi negenggec ngereebes. Nga neni Kristoac siduc gombang kpaie heibinggac negemma ngenearunac semeng memeac dede fedemoc, imoc wama mong mi mema sebiac ebic hania hania tofohoma kecdimbe.

¹³ Ngic Anutuac womonnu ua mekecdae, yeni yakangina womonnu meficgema neandae. Nga aratau kingang ua mekecdae, yeni arataac seseunac tosea meandae, ngeni imoc bic negendae.

¹⁴ Nga goa yeni siduc gombang mekperagingememendae, yeni sing imohacnacngoc kekecnginaac semeng meficgebisia, Kebungo sing imoc faiec. ¹⁵ Ni ine memefic ifia mong mi mekefai. Amma ngeneng wiac mong nenggecdeac negemma kibi yomoc mi ohoduae, kpac. Neanna semeng meficgebade, imocac negemba engena ande. Nga homebaiac mongngo sinna imoc naric

mi meickeude. ¹⁶ Anutungo igocnuma dzegenuu siduc gombung ngicngac edekpou ayemmekecduae. Amma siduc gombung mi dekperagibai dede yeac sowec bageau kecbai. Imocac neannaoc ua gombunga meduae dema kpacna naric mi miacbade. ¹⁷ Amma neanna songo modacma uaac kpesi kpesi faiba naric degec ua yomoc mebau yeneng uabung nenggec mebai. Nga Kebu yengenaoc ua yomoc mebadeac denenec, imoc modacma garengua buma kpac mekecduae. ¹⁸ Nga bunna siriha yofi ande, ni siduc gombung dekperagikecma wiac mebadeac dedea, imoc wadacma engsac naric dekperagiyemmebade.

¹⁹ Ngic mongngo neac kpae mi faiec, kpac. Nga neng ine ngicngac homac kpedziyunubadeac negemma yeneac bageu naric faiemema wanacngicngina amma kecduae. ²⁰ Ni yudangic kpedziyunubadeac amma yenigoc kecma yudangic siricnginau angkecduae. Neannaoc dedeseriyoacac bageu mi kecduae, fora. Nga ngicngac dedeseriyoacac bageu kecdae, yeni kpedziyunubadeac yenigoc kecma yeni isoc dedeseriyoacac bageu kecduae. ²¹ Nga ngicngac goango dedeseriyoacac bageu mi kecdae, yeni kpedziyunubadeac yenigoc kecma dedeseriyoac kpac isoc kecduae. Anu neannaoc Anutuac dedeseriyoac ngadeau yombong mi kecduae, ni ine Kristoac dedeseriyoacgoc kecduae. ²² Kecma ngicngac kucmama kpedziyunubadeac yeni isoc yenigoc kucmama amma kecduae. Amma ngicngac hania hania kecdae, yenearunac goa kopocsicac ebicfunac mesiyunuba komoc

kpegecdeac yenigoc kecma kekec hania hania modacma yeni isoc kecduae. ²³ Ni siduc gombunggac amma uana sasawa mekecduae, kecma imocac fora nasoya hau neanna imocac sirihau noboha mebadeac negensiduae.

²⁴ Nedzi nedziac ngic ariacsobennu firang anggecdeac nedziandae, yeni sasawango nedzimagec mocgungo firanggac sokoc meude, ngeni imoc bic negendae. Ngeni ngenang sokocngina megecdeac ifi isoc nedzibisia.

²⁵ Ngic ariacfu kpacngina faiandae, yeni sasawango sebingina hafoangoc efaiudeac arengegecde. Ngic yeneng dzaring dzangge dzanggea ubaheyemmegecdeac ifi anggecde. Nga nenang dzaring dzangge dzanggea kpac ubahenemmegecdeac sebinina hafoangoc garengemenide. ²⁶ Ni sicsauc mi nedzianduae nga ngicngac maringina eng ukugec pong kpeu ukuandae, ifi isoc mi anganduae. ²⁷ Ni yofi anganduae, ngicngac tosea yenearu siduc gombung edekpou ayemmema hennegeng nasou ngic kpedaha ambaiac sebina kpekecduae. Imoc neac wanac areng amma yoacna modarudeac ifi ammikecduae.

10

¹ Tosofocna, ngeni kisicfocnina yeneac yoaciduc negentegecgecdeac negenduae. Hoengngo kperacyunuu yeni sasawango imocac bageu kengkecma kondung ferecgegec. ² Hoeng nga kondung yereng mitidokungina anu yeni sasawango Mosegoc torokpegecdeac imohai doku nadzicgec. ³ Amma yeni sasawango Asuac

yaka siriha mocgu nekenggec. ⁴ Asuac hoc peperandzingo modacyunuu hoc ihacnacnoc doku mau yeni sasawango Asuac doku siriha mocgu nekenggec. Nga hoc peperandzi imoc Kristonoc. ⁵ Nga Anutungo kisicfocngina botucnginau ngic homac yeneac fakanginaac amma ubea mi ngereec. Mi ngereeu yeni bangecfu mayunuu homedacgec farengnginango bangec kisiu sinsararang kpema fekenec.

⁶ Yeni faka mangana angkecgec, imoc ifingoc nenanggaru fingeccbacac siduc imoc nenanggac amma faifaia fede. ⁷ Amma monggoc deba, ngeni yeni isoc nemu eweheihei mi ayemmebisia. Yeneac yoac yofi oho ohoya fede, “Ngicngac yeneng matacma nenedoku nemaguc yacma yegec fede fede kecgec.” (*Makekeng 32:6*)

⁸ Anu mong deba, nenang ifingoc serofaka mi ambisina. Yenearunac ngicngac goa yeni serofaka angkecgecac ngicngac 23 tauseng yeni uameme mocguac manau makpema homedacgec. ⁹ Ni monggoc torokpema deba, goa yeneng Kebu faitobang ammigec boidzoc yeneng yinigec homedacgec. Nenang ifingoc Kristo mi tobanggebisina. ¹⁰ Nga ngicngac goa yeneng modzotitiac yoac degec ngickpekke angerongo hama kpebucyunuec. Nenang siriha imocngoc modzotitiac yoac mi debisina. ¹¹ Faka yenearu fingerec, imoc ongea isoc ande. Siriha imocngoc yofinenggac ngicngac naso wisic wisickeau kecdimbe, imocngo goronina ambeso. Imocac amma yoac imoc mitikibiu oho ohoya fede. ¹² Imocac ngic mongngo

yofi deande, “Ni seria nanduae.” ye kecma makpebacac garengemebeso. ¹³ Anu faitobang ngicngac goa yenearu fingegec, siriha ifia ngenearu ifingoc fingecongmeude. Nga Anutungo yoc dema imoc modarude. Faitobang fingecongmeu ngeni ebic imoc tofohoma kegecde. Nga imocngo kucngina mi feraheudeac faitobang ebiria kpae heimiude. Faitobang hangemmeu yeng imohacnac woragecdeac sing meficgengemmeu faitobangngo kucngina mi memaudeac garengngunuude.

¹⁴ Songo tosofocna, nemu yeneng witicngunubauac ngeni nemu eweheihei faka wama imohacnac worama yeni mi hoangyunubisia. ¹⁵ Ngeni ngicngac negen negentegecnginagoc, imocac amma ngeniac yofi deba, ngeni ngenaocngoc yocna negemma isinggebisia. ¹⁶ Kenecac sokoc keneheandimbe, nenang imoc nema Kristo yengena sawagoc kpeketahema yegoc sac mocgu annide. Nga ic sogong tueandimbe, imoc nema Kristo yengena sebigoc torokpema yegoc sebi mocgu annide. ¹⁷ Ic sogong imoc hafac mocgu. Yeni hafac mocgusac mema imohacnac mederenemmegec nenang sasawango imoc neandimbeac nenang ngicngac homac kecma sebi mocgungoc andimbe.

¹⁸ Ngeni Israe ngicngac yenemma negensibisia. Ngicngac seseac wiac ohogec noboha neandae, yeni arata kpanjangandae. ¹⁹ Ngicngac nemu sesengina dema wiac heiyemmegec, imocngo wiac engena mi ande, ngeni yocna imoc negentegecgec. Nga nemu yengena ifingoc wiac en-

gena mi ande. ²⁰ Nga bangeha bangeha ngicngac Anutu mi negemmidae, yeneng seseac wiac faian-dae, imoc Anutuac negemma mi faigecde. Yeni ine hadehade nga yafinggac negemma sesegerec ohoandae. Nga ngeneng ine hadehade nga yafing yenigoc kpanyunugoc mi ngereede. ²¹ Ngeni Kebuac sokoc nga hadehade nga yafinggac sokoc momoc mema imohacnac ifingoc negecde, imoc naric mi ngereede. Nga ngeni Kebuac yaka nga hadehade nga yafinggac yaka momoc kpanyun-dae, imocngo osiande. ²² Nga kucninango Kebuac kuc mi ferahade. Nenang Kebuac here miacbing-gac ifi mi ambisia.

²³ Goa yeneng deandae, “Wiac hania hania sa-sawa annideac kpae mong mi fede.” Nga neng ine yofi deduae, “Faka goa imocngo tosofocga ye-neac memefic mi anude. Wiac sasawa annideac kpae mong mi fede, fora. Amma faka goango ine mi miacnunuma meserinunuude.” ²⁴ Ngic ye yengena gombang fingerudeac negemma fakaya mi ambeso, kpac. Ngeni tosofocngina yenearu gombunga fingerudeac negensima fakangina ambisia.

²⁵ Ngicngac yeneng suenefu wiac sasawa faigec ngeni imoc here negen negengnginaac amma heikpesia kpac naric eng menec ambisia.

²⁶ “Bangeha bangeha nga wiac sasawa bangecfu fede, imoc *KEBUAC*.” (Mitiyegec 24:1)

²⁷ Anu ngicngac Kebu mi negensinggeandae, yenearuac mongngo ameau kpanyunuu ngeneng yofi ambisia, ngeni ihai kenggecdeac negenggec naric anu yeac amau embisia. Enggec yeng yaka ngemmu ngeni here negen

negenginaac amma dekpesi mong mi amma imoc naric nedachisia. ²⁸ Nga ngic mongngo yofi dekperagingemmeudeu, “Yomoc nemu seseac yang noboha.” imohai ine yaka imoc mi nebisia. Imoc yengena nga here negen negenggac amma yaka imoc wama mi nebisia. ²⁹ Nga geac here negen negenggaac mi deduae, kpac. Ni tosogaac negemma imoc deduae. Nenang kpaea kpac kecdimbeac ngic monggac here negen negengngo naric mi isinnunubeso. ³⁰ Nga ngicngac yenigoc yaka nema Kebuac dangge denideu yeneng wiacac bic dangge deding, imocac desure naric mi anemmebisia.

³¹ Ngeni nenedoku nedae me wiac mong angandaeu ngeni Anutuac negensima dengerebisia. ³² Ngeni yudangic nga grikgic amma Anutuac kpebungfora negemmangang mi meficgeyemmebisia. ³³ Anu ngicngac homac ebicfunac mesiyunuba komoc kpegecde nga yeneac gombunga fingerudeac amma ua imoc mekecduae. Neanna gombunna fingerudeac ine mi mekecduae.

11

¹ Ni Kristoac faka nga angammeme modacanduae nga ngeneng siric imocngoc neac faka nga angammeme hemma modacnubisia. ² Nga ngeni neac wiac sasawa negensidae amma yoaac eden-gunuma ngemmeai, imoc meandae, imocac dengerengunuduae.

³ Ngic mocgu mocgu sasawa yeneac orucngina imoc Kristo nga ngac mocgu mocgu yeneac orucngina imoc ngic amma Kristoac oruha

imoc Anutu, ngeni imoc negentegecgecdeac nengenduae. ⁴ Nga ngic mong ye oruha kperahema numuude me profeteyoac deude, ye yengena oruha gamekpekpe meficgemiude. ⁵ Nga ngac mongngo oruha mi kperahema numuude me profeteyoac deude, ye ine yengena oruha gamekpekpeu faiude. Imoc ngac mongngo oruha wedzecedarec isoc. ⁶ Amma ngac mong ye oruha mi kperahau ye oruha merecgeu wegena ambeso. Nga ngac ye oruha ifi merecgeude me wedzerude faka imocngo gameagoc andeu ye oruha kperahema kecbeso.

⁷ Ngic ye Anutuac onga nga kibikperagia, imocac amma ye oruhau wiac mong faima mi kperahebeso. Ngacngo ine ngicac kibikperagia. ⁸ Anutungo ngic ngacfunac mi meficgeec, ye ine ngac ngicfunac meficgeec. ⁹ Nga ngic ye ngacac amma mi mefic meficgea, ngacngo ine ngicac amma mefic meficgea. ¹⁰ Imocac ngac ye kuha femide imocac ma isoc wiac mong oruhau heima kperahebeso. Ye angero yeneac amma ifi ambeso.

¹¹ Ngac ye tembuha kekec imoc mi fede nga ngic ye tembuha kekec ifingoc mi fede. Ngic nga ngac ngeni meficemema kecbisia, Kebungo areng ifi faiec. ¹² Ngac ye ngicfunac mefic meficgea, ifi isocngoc ngic ye ngacfunac fingec fingera amma wiac sasawa imoc Anutuarunac hakecde.

¹³ Ngeni ngenaoc faka imoc isingebisia. Ngac mongngo oruha mi kperahema Anutu numumiande, imoc mi ngereeude. ¹⁴ Anu ngic mong ye orucsabaya kuneng mekecde me oruczoya dzegeande, faka imocngo gameagoc

angande. Ngic nenang angammemeninango imoc kpounemmekecde. ¹⁵ Nga ngac mong ye oruczoya kuneng femideu ye imoc negenu wiac engena, imoc naric nga gombunga, nocac ye oruczoyango orucsira kperaheudeac imoc mekecde. ¹⁶ Mongngo yocac yomocac deendema anudeac negendeu ye yofi negembeso, nenearu faka ifia mong mi fede nga Anutuac kpebung yeneac botucfu faka mong ifia ifingoc mi fede.

¹⁷ Yocac torokpema edengunuba, imoc dedengerecyocac mi debade. Ngeni tutumangnginau ubagombung yocac mi dema ngenaocngoc memanganeemeandae. ¹⁸ Nga hanahema yomocac deduae, ngeni kpebunnu kpedzucnema tacma yocacngina tohoemeu kecandae, imoc negenai. Yocac imocac negemba fora isoc ande. ¹⁹ Ngenearu tohoemeemefaka fingecheso. Anutungo ngicngac damoc fakangina fora hemma botucnginau nanggeyunuande, imoc didiu fingectegerude. ²⁰ Ngeni kpedzucnema enacurec yaka neandae, imocngo Kebuac maung fora mi angande. ²¹ Amma ngeni yaka mehama yakanene nasou ngicngac tembuc tembuc ngenaoc yakanginasoc nedacgec goango ine herenginaac homeandae nga goa ngeneng doku homac yombong nema ubangina sufuande. ²² Ngeni amanginau tacmangoc yakangina waraima nebisia, faka imocngo naric ambac. Ngeni Anutuac kpebung ngadeyunuandae, ifi isoc angandae. Amma tosofocngina goa iwaingina kpac kecdae, yeni gamekpekpe ayemmeandae. Ifi angandaeac dafi dema dengerengunubade, imoc

obohode.

²³ Kebungo yoac yomoc edenuu negenai. Nga yoac imoc warac bic edengunuai, imoc yofi, Yudango Yesu doc meec, tofocnac imohainoc yofi fingerec, Yesungo ic sogong mong mema ²⁴ Anutuac ubangerec dema ic sogong mendz-icma yofi deec, “Yomoc fusina, imoc ngenear amma faifaia. Ngeni imoc nema neac negensima nekecbisia.” ²⁵ Nga yaka negec wisickeu ye kpakenec mema yofi deec, “Kpakenec yomoc sacnaac dzadzahac gboria. Ngeni imoc negecdesoc neac negensima nekecbisia.” ²⁶ Ngeni ic sogong nga kpakenec yomoc negecdesoc, naso imohai Kebuac homec dekperagigecde. Dekperagi kec-magec ye haude.

²⁷ Ngic mong ewehiheiha kpac Kebuac ic sogong nga kpakenecfunac neudeu Kebuac sacfusiac turunga imoc yearu fingerude. ²⁸ Ifi anu ngicngac tembus tembus ngeni ngenaoc isingememaguc ic sogong nema kpakenecfunac nebisia. ²⁹ Ngic mong ye Kebuac sacfusia mi hentegecma engsac neude, ye nenedokuyau kopocsicac turunga mefigemiude. ³⁰ Fakangina ifiac amma botucnginau ngicngac homac yeni kucmama nga hafeinginagoc andae. Amma goa yeni bic wan-gunuma homegec. ³¹ Nga nenang tembus tembus hanianina faka forau hengising annideu kopocsicac turunga nenannu mi habac. ³² Anutungo ngade bangec nga kurumeng memanganema meickeude, nenang imocgoc manganebinggac ye kopocsicac turungango metinnunuude.

³³ Tosofocna, imocac amma yofi ande,

ngeni yaka negecdeac kpeturanggema haandae, naso imohai ngicngac ogofocngina waraima megecdeac tomai ambisia. ³⁴ Nga ngeni tutumangnginau kopocsicac turunga meficgebauac ngic mongngo hereaac homeudeu ye ameau tacma yaka nemaguc habeso. Nga yoacna tosea fede, imoc ngenearu hamaguc torokpema edengunubade.

12

¹ Tosofocna, Asuac ua fede, ngeni imocac wiac negenggecdeac negenduae. ² Ngeni Anutu mi negensinggema kecgec, naso imohai hadehade nga yafing yeni nemuonga yoacngina kpac, yenearu wangepngunugec ngeni modacyunuma engsac kengkecgec, ngeni imoc negendae. ³ Imocac amma yofi deba negembisia, Anutuac Asungo ngic mong meu yeng yofi mong mi deude, “Yesu ye sowehagoc.” Nga Tiri Asungo ngic mong meu yeng, “Yesu ye Kebu.” ifi naric deude. Asu siriha mongngo yearu ua meu ine imoc deudeac obohoude.

⁴ Asungo wosoefahaac amma kuc hania hania nemmeande, imoc sasawa Asu mocgu, yearunac hakecde. ⁵ Nga Kebungo ua hania hania nemmeande, imoc sasawa Kebu mocgu, yearunac hakecde. ⁶ Amma Anutungo sing hania haniau kuha mederenemmeande, imoc sasawa Anutu mocgu, yearunac hakecde.

⁷ Asungo ngicngac meficnunuudeac arengfora tembus tembus menunuma kekecninau kuha mekperagiude. ⁸ Amma Asungo ngicngac menunuu mongngo yoac negen negentegecgoc

deude nga mongngo yoc keme kemea deude. Nga Asu mocgungo nenearu ua imoc meude.

⁹ Mongngo Asuarunac negen negensing seria meude. Nga mongngo yearunac hafei mengec mengereac kuc hania hania meude.

¹⁰ Asu imocngoc ngic mong faka hania hania kuhagoc meudeac negen negeng miude. Nga mongngo profete yoc deudeac negen negeng miude. Amma mongngo asu hania hania isingyunuudeac negen negeng miude. Nga mongngo nedzarangyoc hania hania deudeac negen negeng miude. Amma mongngo nedzarang yocfusing yoc merenudeac negen negeng miude. ¹¹ Asu ye mocgu amma yennoc ua sasawa mekecma negen negenga nga songoya modacma kuha arengfora tembuc tembuc mederenemmeude.

¹² Sebinina imoc mocgu nga imocac tosea homac fekende. Imocac tosea sasawa kpeturanggegec sebi mocgu anude. Nga Kristoaru siriha ifi isocngoc fede. ¹³ Asu mocgungo kpeturannunuma doku nadzicnemmeu sebi mocgu aning. Nenang yuda ngicngac me grik ngicngac me wanac areng me witicnina kpac kecdimbe, nenang sasawa Asu mocgungoc mema doku isoc nedaring.

¹⁴ Sebinina imocac tosea homac fekende, imoc wiac mocgu kpac. ¹⁵ Nga haningo yofi debac, “Ni mari kpac, imocac amma sebiac tosea mong mi anduae.” ye sifu sebigoc torokpema sebiac tosea anude. ¹⁶ Nga kedzacngo debac, “Ni kic kpac, imocac sebiac tosea mong mi anduae.” ye sifu sebigoc torokpema imocac tosea anude.

¹⁷ Anu sebingo hafoangoc kicsac ambac dede ye yoac negenudeac osibac. Me hafoangoc kedzac-sac ambac dede ye homuna negenudeac osibac. ¹⁸ Yaguc yofi ande, Anutungo negen negenga nga songoya modacma sebiac tosea sasawa tembuc tembuc sebi mocguaru arengyunuma torokpeyunuec. ¹⁹ Anu sebiac tosea sasawango siric mocgusac ambac dede yeni kpeturanggema sebi mocgu hafoangoc naric mi ambau. ²⁰ Sebi ye mocgu nga sebiac tosea yeni homac.

²¹ Nga kicngo mariaac yofi naric mi deude, “Ni gea kpac tembuc naric kecbade.” Amma orucngo haniac ifingoc yofi naric mi deude, “Ni ngeria kpac tembuc naric kecbade.” ²² Imoc kpac, sebiac tosea goa kucngina mamea de-andimbe, yenennoc sebininau uatoa yombong meandae. ²³ Nga sebiac tosea goa negenni ewehei-heia kpac, yeni eweheihei monggoc ayemmema kperacyunuandimbe. Amma sebiac tosea goa henggecdeac negenni gameagoc angkecde, imoc faka gombunga modacma kperahekecdimbe.

²⁴⁻²⁵ Nga sebininaac tosea goa eweheiheing-inagoc, yeni kperacyunubesonga mi negengandimbe. Amma sebinina tosea yenaocngoc tohoemebauac Anutungo sebinina arenggema sebinina tosea goa mamea negengandimbe, yeni ine monggoc eweheyemmeec. Eweheyemmema yeni socfungoc garengemegecdeac ifi anec. ²⁶ Amma sebiac tosea mongngo kpendzeng kpeudeu sebitosofora yenahafocngoc meficgema kpendzeng kpegecde. Nga sebiac tosea mong dengereudeu sebiac tosea sasawa yeni

yenahafocngoc sogaigecde.

²⁷ Anu ngeneng ine yofinenggac Kristoac sebi amma tembuc tembuc sebiaac tosea andae.

²⁸ Amma Anutungo kpebunnu ngicngac goa yofi faiyunuec, warac warac aposoro nga yeneac ngadeau profete amma yeneac ngadeu mitiac kpoukpou faiyunuec. Ifi faiyunumaguc goa faka kuhagoc megecdeac faiyunuec. Ngicngac goa yeni hafei ua hania hania megecdeac Asungo imocac kuc yemmeec. Amma ngicngac meficyunugecdeac areng goa faiyunuec nga wiac garenggegecdeac ngicngac ifia faiyunuec amma goa nedzarangyoac hania hania degecdeac faiyunuec.

²⁹ Anu nenang sasawango aposoro mi annide nga sasawango profete mi annide, kpac. Amma sasawango kpoukpou mi annide. Nga sasawango kucfaka menideac negen negeng mi mekecdimbe. ³⁰ Amma hafei ua hania hania menideac Asungo imocac kuc nenang sasawa mi nemmeec. Nga sasawango nedzarangyoac mi deandimbe amma sasawango yoacninausing imoc mi merengandimbe.

³¹ Anu ngeni Asungo wosoefahaac amma kuc nemmeande, imocac engenaya megecdeac serima kecbisia. Amma sing mong torokpema edzancngunubade imocngo sing sasawa feracyunude.

13

¹ Ni Asuac kucfu yoac hania hania debai me Asuac kucfu angero yeneac yoac hania hania debade amma ngicngac yeni heresongogoc ine mi hoangyunuma kecbai, imohai ni gonggong isoc

arohoma me tambaring isoc udumengtoasac angkecbade. ² Amma profeteyoac debai dede nga negen negeng keme kemea sasawa negentegecbade amma negen negentegecnagoc kecbai dede tiki meickebadeac negen negensinna imocacsoc fenende amma ngicngac yeni heresongogoc ine mi hoangyunubai foraya mong mi meficgebai. ³ Nga dzofinacna sasawa mederema ngicngac yemmebai amma sebina meemma homecfu faibai nga ngicngac yeni heresongogoc ine mi hoangyunubai dede ni foraya mong mi meficgebai, kpac.

⁴ Heresongogoc hoangemema kekec, imocngo ngic monggac modzotiti mi negenude, ye yumea kefude. Nga imoc keracmanganga kpac kecma yengena yoac homac mi deude amma sebiengeng mi anude. ⁵ Ye faka mi angana, imoc mi amma yengenasac mi negensiude. Ye herebuya kpac kecma turungyoac mong mi deude. ⁶ Ye faka manganaac amma ubangerec mong mi negenude, kpac. Ye faka foraac ine sogaiude. ⁷ Ye wiac monggac modzea mi tiude. Ye wiac sasawa negensingeude amma wiac sasawa fingerudeac negensima kecma, imocac kucmama mi anude. Nga wiac hania hania fingecmiu serima nanude.

⁸ Heresongogoc hoangemema kekec, imocngo naric mi kpac anude. Profeteyoacnina imoc ine kpac anude amma nedzarangyoacnina imoc meickeu kpac anude nga negen negennina keme kemea, imoc ifingoc kpac andarude. ⁹ Negen negennina amma profeteyoacnina imoc wiac nobo-hasac nemme nemmea. ¹⁰ Nga wiac hafoa fede,

imoc Anutuarunac hauguc wiac noboha nemme nemmea, imoc kpac andarude. ¹¹ Ni medac kecma medacbasicac siricfu faka negensima yoc dekefai amma medacbasicac siricfu negen negeng isinggema arenggekefai. Kecma ngic amba nambarac kekec meickeu yada sing kecduae.

¹² Anu yofinenggac wiac hengandimbe, imoc wikinnu onga irec ireckea kpac, ifisac wiac hengkecdimbe. Ngade kecma wiac fora kicngo hennide. Yofinenggac wiac noboha negengandimbe. Anutungo hafoangoc negennenec, ni ifi isoc naso imohai wiac hafoangoc negendacade. ¹³ Ifi anu wiac harebecngo feengkefude, imoc nenang Kebu negensingedimbe nga kekecseri febesande imocac negen negeng amma heresongogoc hoangemema kekec. Nga wiac harebec yenearunac wiac mocgungo engena ande, imoc ngicngac ogofocnina heresongogoc hoangeme kekec.

14

¹ Ngeni heresongogoc hoangeme kekecac angemebesoso. Amma ngeni Asuac faka megecdeac songongina kuneng ambeso. Amma ngeni profeteyoac megecdeac negenggec engena yombong febeso. ² Mong ye nedzarangyoac fusing yoac deande, ye ngic nenanggoc yoac mi deude, kpac. Ye ongaasuyango yoac keme kemea Anutu edeu, ngic mongngo imoc naric mi negentegerude. ³ Nga mong ye profeteyoac deande, yeng ngicngac ubaherengina midima meserinunuma nanggenunuude. ⁴ Nga

ngic nedzarangyoac deande, ye yengena meseriemeude nga profeteyoac deande, yeng kpebung meserinunuude. ⁵ Anu ngeni sasawango nedzarangyoac degecdeac negemba ngereede. Nga ngeni profeteyoac degecdeac songona kuneng ande. Mongngo nedzarangyoac dema yoara mi merenudeu ye ngic profeteyoac dede, yeac mamea anude. Nga yeng yoara merenudeu ye ifingoc kpebung meseriu socngira mocgu anecde.

⁶ Tosofocna, ngenearu hama yoac goa dekperagingemmebai me yoac keme kemea goa eden-gunubai me profeteyoac debai me kpoukpouyoac goa debai dede imocngo memeficngina ambac. Ni ine ngenearu hama nedzarangyoacsac debai dede, imoc memefiha kpac ambac.

⁷ Imoc ifingoc fora yofi ande. Kungac nga gita yeri kekecngira kpac amma yeri sifu udumengngiragoc. Ge imoc eng sicsauc kpena udumenga siriha mi fingerudeu ngicngac yeni kungac me gita imocac ubea obohogecde. ⁸ Amma dzikacac tomengngo udumenga gombunga mi fingeru ngic yeni dzikacac naric mi efaigecde. ⁹ Ge ifingoc yofi negembesena, ubagau yoac dindigac denadeu ngicngac yeni yoacga naric negentegecgecde. Ge ine sicsauc nga kpeboronggoc denadeu yeni yoacga obohogec yoac sawau engsac denade.

¹⁰ Yoac hania hania bangecfu fekende nga yoac mong titiha kpac, imoc mi fede. ¹¹ Ni ngic monggac yoac siriha mi negentegecbadeu yeng yoac deu yeac kicfu kuricngic ambade nga yeng ifingoc neac kicfu kuricngic anude. ¹² Ngeni Asuac

faka megecdeac homac angemmeande nga ngeni Asuac fakango kpebung meseriyunuande, imoc ifingoc megecdeac mamangkibisia.

¹³ Imocac mong ye nedzarangyoac deude, yeng yoac imoc ifingoc merenudeac Anutu numu-mibeso. ¹⁴ Ni nedzarangyoacfu sing numuduaeu ongaasunango numuude, fora. Nga negen negen-nango ine fora mong mi meficgeude.

¹⁵ Ifi anu dafi ambesonga? O, ni ongaasunango numubade nga negen nengentegecnagoc ifingoc numubade. Ni ongaasunango dedengerec yegec heibade nga negen negentegecnagoc ifingoc dedengerec yegec heibade. ¹⁶ Anu ongaasugango Anutu dengerenadeu ngictehec yeni geac dedengerec torokpema, “Imoc fora.” degecdeac obohogece. Yeni yoacga mong mi negentegecgec. ¹⁷ Nga ge geangaoc Anutu dengerena imoc ngereede. Amma yoacga ine ngic ogofocga mi meseriyunuude. ¹⁸ Ni nedzarangyoac deanduae, imocngo Anutu dengereduae. Amma ngeni feracngunudacma nedzarangyoac homac yombong deanduae. ¹⁹ Ni neanna songoac debade nga kpebung botucnginau kecma yoacna 5 negen negentegecnagoc debade, imocngo nedzarangyoacna teng tauseng ferahade, imoc negenduae. ²⁰ Negen negensingoc tosofocna, ngeni negen negentegecnginau nambarac isoc mi kecbisia. Ngeni angammeme manganau ine sabac isoc kecbisia nga negen negentegecnginau yada kecbisia.

²¹ Dedeseriyoacfu yoac yofi oho ohoya fede, “Yoacfusing siraha mong nga ngicngac yeneac

enacbibicnginau dedenginango mong ande, ni ngicngac imoc meyunuma yoacna debade nga ngicngac yeneng ine kedzac mi kpegecde, *KEBUNGO* ifi dede.” (*Yesaia 28:11-12; Dedeseri 28:49*)

²² Ngicngac negen negensingngina kpac kecdae, yeneng kucfaka bibiagoc henggecdeac nedzarangyoacngo imocac faifaia fede. Ngicngac negen negensingnginagoc kecdae, yeneac amma ine mi fingerude. Amma profeteyoac ngicngac negen negensingnginagoc yeneng bibiagoc anggecdeac faifaia fede. Imoc ngicngac mi negensinggedae, yeneac kpac. ²³ Kpebung sasawa kpeturanggema tacma nedzarangyoac degec ngic monnunac me ngic goa negen negensingngina kpac ngenearu botucfu erema imoc ngenemma degecde, “Ngeni ubangina sufude.” ²⁴ Nga ngeni sasawango profeteyoac dema tacmagec ngic monnunac me ngic negen negensinga kpac ngenearu ereu yoacnginango ye hereau meu yengena kopocsiha engenu imocngo yoacfu faiude. ²⁵ Faiu ye ubahereau negen negeng mekefu sufuma fede, imoc didiu fingectegerude. Ifi fingectegeru yeng makpema kicmesuya mesufuma Anutu dengerema deude, “Foracngoc, Anutungo ngenearu botucfu kecde.”

²⁶ Tosofocna, yofi naric ambesonga. Ngeni kpeturanggema tacgecde, imohai ngicngac sasawango ngicngac ogofocngina wiac goa edeemegecdeac mehabisia. Mongngo mitiyegec mong heingemmebeso nga mongngo yoac edekpou angemmebeso amma mongngo yoac goa dekperagingemmebeso nga mongngo

nedzarangyoac debeso nga mongngo imoc merembeso. Ngeni yoac sasawa imoc kpebung meserigecdeac debisia. ²⁷ Anu ngicngac goango nedzarangyoac degecdeu yohockang me harebecngosac debisia. Amma imoc arennu degec mongngo imoc merembeso. ²⁸ Nga nedzarangyoac imocac merem merenggac ngic mong imohai mi tarudeu ngic imoc ye tutumangnginau waickema tacma yengena hereusac Anutugoc denegeng ambeso. ²⁹ Nga kpekpeturanggac amanginau profete yohockang me harebecngosac profeteyoac debisia. Ifi degec ngicngac tosea ngeneng profeteyoacngina negemma isingebisia. ³⁰ Anu ngic mongngo waraima yoac deu yoac sufu sufuyaac dedekperagiyoac mong tacde yearu haudeu ngic waracngo waickemanu ogeango debeso. ³¹ Ngeni sasawango profete yoac naric debisia. Nga debeso dema ngic me ngac mocgu mocgungo arennu yoac imoc debisia. Ifi anu ngicngac sasawango negen negeng megecde nga ngeni ubaherengina midima meserimegecde. ³² Profete asungo ngicngac profeteyoac deandae yeneac negen negeng tofohoande. ³³ Anutu ye sicsaucac Anutu kpac, ye ua arengagoc mema ruaea meficgeande.

Kpebung kpetiac, imocac manau ngac yeni yoacngina waickema kecandae, ifi isoc ³⁴ ngenearu ifingoc ambesonga. Ngac ngeni yoacngina waickema tacma kpebunggac negen negeng modacbisia. Ngeni imohai yoac yoac mi ambisia. Singyoacngo imocac ifi dede. (*Fingec fingec 3:16*)

³⁵ Ngeni wiac monggac hania obohoma negem-beso angemmeu amanginau kemma ewefocngina kpesiyemmebisia. Ngac mongngo kpebung botucnginau yoac yoac anude, imoc faka gameagoc.

³⁶ Anutuac yoac imoc ngenearunac hanahema mi fingerec nga imoc ngenearusac mi kemma fede, kpac.

³⁷ Ngenearunac mongngo yengenaac negenudeu, “Ni profete, ni Asuac negen negenggoc kecduae.” yeng kibi ohoanduae, imoc hennegeng amma imoc Kebuac singyoac, imoc bic negenghomeude. ³⁸ Nga ngic mongngo yoac yomoc osoma waudeu ngeni ye ifingoc wabisia.

³⁹ Imocac negen negensinggoc tosofocna, ngeni profeteyoac degecdeac homac angemmebeso. Nga nedzarangyoacac mi kpetaribisia. ⁴⁰ Nga ngeni wiac sasawa sirihau nga arengagoc ambisia.

15

¹ Tosofocna, ni siduc gombang dekperagin-gemmeba ngeni imoc negemma hoanggema seria mekegec, imoc monggoc heigboringemmebadeac negensiduae. ² Nga yoac edengunuba negenggec negen negensingngina seria imohai feudeu imocngo kopocsicfunac mesingunuu komoc kpegecde. Amma ngeni imoc wagecdeu negen negensingngina uaya kpac anude. ³ Ni hanahema Kebuarunac yoac engena yofi mema ngem-meai, Kristongo nenang kopocsicninaac amma homeu ⁴ tonggogec uameme harebec anu Anutungo megboriu yarec. Faka imoc mi fingecmanu imocac negen negeng mitikibiu bic oho ohoya

feec, imoc fingerec. ⁵ Nga ye Petoro fingecmima ngade medacfora 12 fingecyemmec.

⁶ Imocac ngadeau tosofocnina kpetengina 500 ferahade, yeni yenhafoc tacmagec yeng yeneac kicfu fingeru henggec. Anu yeneacunac goa bic homegec nga homacngo yofinenggac kecdaengoc.

⁷ Ye imocac ngadeau Yakobo fingecmima aposoro sasawa fingecyemmec. ⁸ Nga wisic wisicseau fingecnenec. Nenggac mongngo sabaha kebangsac meude, ni ifi isoc amba yeng sifu fingecnenec.

⁹ Ni Anutuac kpebung yunukporac ayemmemma kefai nga ngicngac yeneng aposoro kpacnuandae, imocacsoc mi anduae, neng ine aposoro yeneac mameangina. ¹⁰ Nga Anutungo wosoefahaac amma ye dafiugeng fainuu ni ifianoc yaguc kecduae. Kecbare wosoefaha eng mi feec. Ni sasawa feracyunudacma ua homac meai. Nga imoc neanna kucac kpac, Anutuac wosoefac nigoc feec, imocngo ua imoc meec. ¹¹ Amma ni nga yeni imocnoc dekperagini ngeni modacma negensinggegec kecdae.

¹² Anutungo Kristo homecfunac megboriec, imoc edekpou angemmekecdimbe nga ngeneacunac ine goango deandae, "Homecfunac yacyac imoc mi fede." yeni ifi deandae, imoc mi heide. ¹³ Homecfunac yacyac mong mi febac dede Kristongo ifingoc homecfunac naric mi gborima yacbac.

¹⁴ Nga Anutungo Kristo mi megboriu yacbac dede neni yoac edekpou angemmekecdimbe, imocngo uaya kpac ambac nga ngeneac negen negensingngina ifingoc uaya kpac ambac. ¹⁵ Homecfunac yacyac mi febac

dede Anutungo Kristo mi megboribac, “Anutungo Kristo megboriec.” imoc ikocfu hepuc amma debing dede Anutuac dedekperagingic ikoha ambing.

¹⁶ Ni monggoc deba, homecfunac yacyac mi febac Kristo yeng homecfunac naric mi gborima yacbac. ¹⁷ Kristongo homecfunac mi yacbac dede ngeneac negen negensingngina imoc uaya kpac ambac nga ngeni kopocsicnginagoc kecbau. ¹⁸ Nga ngicngac goa yeni Kristogoc kpeketahema kecma bic homegec, yeni bic sufuma kpac ambau. ¹⁹ Nga nenang yaguc kecma Kristoac amma kekecseri menide, imoc negensima kecdimbe, imocac ngicngac yeni neneac ubamangangtoa naric negembau. Nga ngicngac sasawa feracyunuma ebicninagoc kecbing. Nga imoc fora mi ande.

²⁰ Foracngoc, Kristongo homecfunac gborima yarec. Ye homecfunac yacyac imocac buma heima ngicngac homemea yeni waraiyemmema homecfunac gborima yarec. ²¹ Ngic mocgungo homecac sing meecac homec fingerec. Imocac amma ngic mocgungo ifingoc sing meu homemea yeneng homecfunac gborima yacgecde. ²² Ngicngac sasawango Adanggac amma homec meficgegec yeni sasawango ifi isocngoc Kristoac amma gborigeccde. ²³ Amma ngicngac nenang tembus tembus arenggoc yacnide. Kristongo waraima yarec amma yeng kecma monggoc haude, naso imohai yeac arengfora yeni gborima yacgecde. ²⁴ Ifi fingecmanu naso wisickeude. Yeng imohai kia gawamang nga sasawa kucnginagoc bangecfu nga sawau kecdae,

yeni meicyunudaru kpac anggec eucererenga Anutu Manggacac mariu faiude. ²⁵ Kebu ye ngictau kecmanu Anutungo ngabafora sasawa hania bageau faiyunuude.

²⁶ Ifi faiyunuma ngabaya wisic wisickea, imoc kpapa homec, ye meickeu kpac anude. ²⁷ Nga

“Anutungo wiac sasawa yeac haniaac bageu bic faidarec.” *(Mitiyegec 8:6)*

Amma “Wiac sasawa.” imoc yeac haniaac bageu faiec, imoc deu nenang yofi ireckebisina, Anutu ye yengenaoc Kristoac bageu mi faiemec. ²⁸ Yeng wiac sasawa Kristoac bageu faiu Medacngo Manggacac bageu faiemema kefude. Nga Manggacngo wiac sasawa Medahaac bageau faidarec, ye yengenaocngoc kecma ngicngac sasawa yeneac oruha anude.

²⁹ Ngicngac goa yeni homemea memefic ayem-megecdeac negensima doku nadzicandae. Homecfunac yacyac mong mi febac dede faka imoc uaya kpac ambac. ³⁰ Uanaac amma ngic yeni nasosoc nubesonga angandae. Nga homecfunac yacyac mi febac dede ni uac fakana sicsauc ambac. ³¹ Kebunina Yesu Kristoac amma tosofocna ngeneac amma wenacsoc homeanduae, fora. ³² Ni Efeso amau wasaiyang yenigoc ewekpekpe anai. Amma ni ngicngac sicsauc kecdae, yeni isoc kecbai ewekpekpena imocac fora mong mi fingeru yofi debai,

“Homecfunac yacyac mi feudeu nenang yaguc nenedoku naric nema wereckenu home-dacnide.” *(Yesaia 22:13)*

³³ Ngic yeneng ikocfu wangepngunubauac ngeni henghomema kecbisia. Manganameme yenigoc kecnideu imocngo fakanina gombunga memanganeude. ³⁴ Ngeni ubasufu yoac wama sing dindingac modacma kopocsic mong mi meficgebisia. Ngenearunac goango Anutu mi negemmi-dae, imoc gameagoc anu edengunuduae.

³⁵ Goa yeneng ine yofi kpesigecde gedang, “Homemea yeni dafiugeng gborima yacgecde nga sebi dafia mema yacgecde?” ³⁶ Ge ngic ubafong yombong. Wiac homecannec, imoc eng mi nemonggeande, kpac. Wiac esea homeu gboriango kekehagoc ereude. ³⁷ Amma gbome homecannec, imoc foradzuamagoc kpac, imoc eng homecnade. Imoc wit gbomea me gbome goa homecnade socngina mocgu ande. ³⁸ Nga Anutungo songea modacma gbome mocgu mocguac sirihau modacma foradzuama miande. ³⁹ Sebinina sasawango siriha mocgungoc mi ande, kpac. Ngic nenang sebinina siriha mong nga yangkposi yeneac mong amma neng yeneac mong nga kondungyang yeneac mong. ⁴⁰ Amma kurumenggac sebi nga bangecac sebi, yeri siricngira mong mong andape. Kurumenggac sebi ye yengena kibikperagiagoc nga bangecac sebi imoc yengena mong. ⁴¹ Wenacac kperagi imoc yengena siriha mong nga afoac kperagi imoc yengena siriha mong amma asomenggac kperagi, imoc yeni siricngina mong ande. Amma yeni kperaginginaac siriha tembuc tembuc ande.

⁴² Homecfunac yacyac, imocac siriha ifinoc fede. Ngic sebingina bangecfu faiandimbe,

imoc pereckema dzamema kpac anude. Nga Anutungo imoc monggoc megoriu imocngo fekengkechesande. ⁴³ Fareng ye kpauema homuna fiu bangecfu tonggoni, imocngo kibikperagiagoc amma gborima yarude. Wiac kucmama anu bangecfu homecni, imocngo kuhagoc nemonggema yarude. ⁴⁴ Ngic sebingina tonggoandimbe, imoc sacfusigoc nga Anutungo sebingina megoriude imoc asugoc. Sebi ye sacfusigoc feudeu asu sebi ifingoc feude. ⁴⁵ Imocac yoc yofi oho ohoya fede,

“Adang warac warac, ye ubaongayagoc nga kekehagoc fingerec.” *(Fingec fingec 2:7)*

Fingeru Adang wisic wisickea, ye asu kekeha nemmeude. ⁴⁶ Asu sebi ye waraima mi haec, kpac. Sebi sacfusigoc yeng ine hanahema hamanuguc asu sebi ye ngade haec. ⁴⁷ Ngic waraima haec, ye bangecngo memea bangecfunac fingerec. Nga yeac ngadeau haec, yeng kurumennunac haec. ⁴⁸ Nenang ngic bangecngo memea, ye isoc kecdimbe. Nga kurumenggac ngic kecede, ye isoc kurumennu kecbesandimbe. ⁴⁹ Nenang bangecngic yeac siric meing, ifi isocngoc kurumenggac ngic yeac siric mema kecbesandimbe.

⁵⁰ Tosofocna, sebi sacfusigocngo Anutuac eucererenggac maridzoming naric mi meude, kpac. Wiac pereckema dzameude, imocngo wiac fekengkefudeac maridzoming ifingoc naric mi meude, imocnoc edengunuduae. ⁵¹ Yoc mong sufu sufuya fede, imoc dekperagiba negenggec, nenang sasawa mi homemina Kebungo homemea

yenigoc nenahafoc sasawa heimerennunuu siric mong andacnide. ⁵² Imoc yofiac, trampet wisic wisickea imocac nasoyau trampet mongngo arohomanu wiac sasawa bic yombong piratac heiande me kicparac kpouandimbe, ifi isoc fingerude. Yeng ngicngac bic homegec, yeni megboriyunuu yeni yacma kekec dzonggo dzonggoya kpac megecde. Ifi fingecmanu nenang ifingoc heimerennunuu siric mong annide. ⁵³ Anutungo wiac hoac hoaea nga homemea ye kekec dzonggo dzonggoya kpac ngakpi isoc heimiude. ⁵⁴ Nga Anutungo wiac hoac hoaea nga homemea kekec dzonggo dzonggoya kpac ngakpi isoc heimiude, yoac yomoc mitikibiu oho ohoya fede, imoc fora fingerude, “Kekecngo firang amma homec gbokou kpac anec.” *(Yesaia 25:8)*

⁵⁵ “Homec ge firang monggoc mi annade, waega imoc kpac anec.” *(Hosea 13:14)*

⁵⁶ Homecac waea, imoc kopocsic nga kopocsicac kuc imoc dedeseriyoac. ⁵⁷ Nga Anutungo sing meficgenemmeu nenang Kebunina Yesu Kristoac amma firang angkecdimbe, imocac Anutu ubangerec ammidimbe. ⁵⁸ Tosofocna, Kebuac ua meandae, imoc sicsauc mi meandae, ngeni imoc negendae. Ngeni imocac Kebuac ua mi wabisia, kpac. Ngeni nasosoc seria namma imoc mekecbisia.

16

¹ Kpetiac areng Yerusarennu kecdae, yeneac amma hiedzo yofinenggac kpedzucnekecdimbe, imocac yoac yofi deba, ni Garata kpebung edekpou ayemmeai, ngeni imocngoc ambisia.

² Ngeni sondasoc tembus tembus dzongina ereandesoc, imohacnac tosea hendzicma amanginau faigec tacheso. Ifi anggec ni habade, naso imohai kpekpedzucac uatoa mi menide.

³ Ngeni ifingoc ngic goa meisingyunugec nga neng hama Yerusarennu ubangerecac hiedzo nga ngic kibinginagoc naric sueyunubade. ⁴ Nga negemba naric kekenggac siric anu ni ifingoc yenigoc nenahafoc kennide.

⁵ Ni Makedonia kemmaguc ngenearu sing habade. Nocac ni Makedonia prowins ferecgemaguc habade. ⁶ Hama ngenigoc tacba wisickeu noboc me noboc kembade. Uaac titinga fingeru ngenigoc naso herea isoc kecbade. Naric anude isoc nomang naso hafoangoc kecbade. ⁷ Ni yofinenggac ngenearusing eng ferecgema kembadeac mi anende. Kebungo negemmanu hama naso herea isoc ngenigoc kecbadeac ine negensiduae. ⁸ Amma Efeso bangecfu kecbare Pentekos naso wisickeu monggoc wama kembade.* ⁹ Yomohai ua kuneng yombong mebadeac sing sarima fede. Nga ngabafocna homac yomohai ifingoc kecdae.

¹⁰ Timoteongo ngenearu haudeu ye negengy-ohoha kpac botucnginau kefudeac areng faibisia. Ye ni isoc Kebuac ua mema kecde. ¹¹ Ngenearunac mongngo ye mi ngadehebeso. Ye monggoc nearu dzigeneudeac deu ngeni singa meefaima ruaegoc suegec habeso. Ni nga negen negensinggoc tosofocnina neni yeac tomal kecnide.

* **16:8:** Pentekos imoc ifingoc Yuda yeneac hombang mong.

¹² Ni Aporo homac igockema yofi negenai. Yeng kpebungac areng goa yenigoc ngenearu habeso. Amma ye bic haudeac mi ammiac. Ngade kecma titinga mong fingeru naric haude. Yeac ifi deduae.

¹³ Ngeni garengemema efaima kecma negensinggema serima nambisia. Ngeni ngic siric amma seserigoc kecbisia. ¹⁴ Amma ngeni hoangemema heresongogoc wiac sasawa ambisia.

¹⁵⁻¹⁶ Stefana nga arengfora yeneng Akaia bangecfu hanahema uaac buma heima ubamereng anggec. Yeni ubamereng amma hanahema kpebung kpetiac meficngunugec, ngeni ngicngac imoc negengyunudae. Tosofocna, igocngunuma yofi deduae, ngeni ngicngac ifia nga goa yenigoc kecma uatoa mema kecandae, yeneac yoacngina modacbisia. ¹⁷ Stefana nga Fortunato amma Akaiko, yeni ngeneac tatac mema nearu hagecac amma ubangerec negenduae. ¹⁸ Amma yeni neac ongaasu nga ngeneac ongaasu momoc midigec ngereeing, imocac ngeni ngic ifia eweheyemebisia.

¹⁹ Asia prowins manau kpebung fekendae, yeneng wenacngerecngina faigec ngenearu hade. Nga Akpira amma Prisika, yereac amau kpebung kpedzucneandae, yeni Kebuac kpacfu wenacngerecngina suegec ngenearu hade. ²⁰ Amma negen negensinggoc tosofocnina sasawango wenacngerecngina suegec ngenearu hade. Ngeni titikokoc kpetiac angemema wenacngerec angemebisia.

²¹ Ni Paurongo wenacngerecyoac yomoc neanna marinango ohongemmeduae. ²² Mong ye

Kebu heresongogoc mi hoanggeudeu sowecngo yeac witiu febeso. O Kebu, ge hana.

²³ Kebunina Yesuac wosoefacngo ngenigoc febeso. ²⁴ Ngicngac Yesu Kristogoc kpeketahema kecdae, songonango sasawa ngenearu febeso. Imoc fora.

**Yoac kekehagocac Dzadzahac gboria nga
Mitiyegec
The New Testament and Psalms in the Dedua
Language of Papua New Guinea
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 3 Mar 2023 from source files dated 9 Oct 2020

19b7c48c-f4ce-5007-838d-58f01dc01ecc